

Nipilersortartut immiussinissamut 10.000 kr.tikillugu tapiissummik misiliutaasumik 2022-miit augustip aallaqqaataani atuutilersussamik Naalakkersuisut pilersitseqqullugit Inatsisartut aalajangiiffissaattut siunnersuut. Katillugu ukiut marluk ingerlaneranni 300.000 kr.-nik aningaasalerneqassaaq, Nunatsinni nipilersukkanik saqqummersitsisarnerup siuarsarmisaaq siunertalimmik. Misilittagaalersimasut nalilersuinissamut atorneqassapput avammut tunisassiornikkut kiisalu eqqumiitsuliornikkut siuariarsimanermut sunniuteqarsimanersut.
(Inatsisartunut ilaasorta, Aqqalu C. Jerimiassen, Atassut)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Siullermeerneqarnera

Naalakkersuisut Inatsisartunut ilaasorta Aqqalu C. Jerimiassenip, Atassut, Inatsisartut aalajangiiffigisassaattut siunnersuummik saqqummiusnaanut qujapput.

Eqqumiitsuliortorpassuit, matumani nipilersortartut ulluinnarnut nutaanut naleqqussarsimasut amerlasuut takullugit Kultureqarnermut Naalakkersuisutut tulluusimaarpunga. Nipilersorneq amerlanerit ilisimasaattut eqqumiitsuliornervoq pisariaqartitsiffitsinni pissarsiarineqariaannaasoq.

Eqqumiitsuliortutta, tassani ilaallutik nipilersortartut, siunnersuuteqartup tapiissuteqartarnikkut atugarissaarnerunissaanik kissaatigineratigut, ukkatarineqarnerat Naalakkersuisut qujamasuutigaat. Naalakkersuisut, siunnersuutigineqartup siunertarpiiaa isumaqatigivaat, isumaqarlutilli allaanerusumik aaqqinneqassasoq.

Ullumikkut aningaasanut inatsimmi imaluunniit kulturi pillugu inatsimmi atuuttumi tapiissutinut aaqqissuussinissamut siunnersuutigineqartoq periarfissaqanngitsoq siunnersuuteqartup oqaatigaa, taamaattumillu suliniut kulturi pillugu inatsimmik tunngaveqarluni aallartinneqarsinnaanani. Eqqumiitsuliorneq pillugu inatsit siunnersuuteqartup isummerfigigaa isumaqartoqarpoq. Tassani aallaaviuvoq, siunnersuuteqartup tapiissuteqarnermut aaqqissuussineq misiliummik aaqqissuussinertut siunnersuutigimmagu.

Naalakkersuisut aamma kommunalbestyrelsi sunut tapiisinnaanersut Eqqumiitsuliornermik ingerlatsineq pillugu Inatsisartut inatsisaanni nr. 11, 6. juni 2016-imeersumi (eqqumiitsuliorneq pillugu inatsit) § 8-mi malittarisassatigut aalajangersarneqarpoq. Ilaatigut tassunga ilaapput eqqumiitsuliorluni suliartortinneri suliarinerilu. Tapiissuteqarnermut aaqqissuussinerup siunnersuutigineqartup tamatuma iluani inissaqartinneqarsinnaasoq, taamaalillunilu eqqumiitsuliorneq pillugu inatsimmut akerliunngitsoq Naalakkersuisut nalilerpaat.

Naalakkersuisut Eqqumiitsuliornermut Aningaasaateqarfik pillugu nalunaarut akuerivaat (Namminersorlutik Oqartussat nalunaarutaat nr. 43, 13. august 2021-mersooq). Eqqumiitsuliornermut Aningaasaateqarfiup suliassat Naalakkersuisut eqqumiitsuliornermik ingerlatat tamakkuninngalu siammarterisartunut tapiissutaannik aqutsinermit tunngasut nalunaarut 1. januar 2022-miit atuutilertussaq naapertorlugu isumagilissavai. Taakkununnga ilaatigut ilaapput nipilersornermut tapiissutitut qinnuteqaatit. Eqqumiitsuliornermut Aningaasaateqarfik tapiissutit assigiinngitsut eqqumiitsuliornermut sorlermut atorneqassanersut aammalu qanoq annertutigisunik tapiisoqarsinnaanersoq pillugit pingaarnertut killissaliussat malillugit malittarisassanik erseqqinnerusunik aalajangersaasassasoq, Naalakkersuisut Eqqumiitsuliornermut Aningaasaateqarfiup pilersinneqarneranut tunngaviusunut naapertuunnerpaasoq isumaqarput.

Nipilersortartut nipilersuusiorterlu Eqqumiitsuliornermut Aningaasaateqarfimmit januar 2022-miit taperneqartalissapput. Aningaasaateqarfiup eqqumiitsulioriaatsit eqqumiitsulioritullu sapinngisamik pitsaanerpaamik tamaasa aningaasaliiffigisassagaat Naalakkersuisut qularutiginnilaat, tassani ilaallutik nipilersorneq nipilersortartullu.

Naalakkersuisut taamatut oqaaseqarlutik siunnersuut itigartinneqassasoq inassutigaat.